

Pled d'avertura da la sessiun d'october 2023
President dal Cussegl grond Franz Sepp Caluori

(Valair vala il pled discurre)

Stimadas deputadas e stimads deputads

Stimà signur president da la Regenza

Stimada dunna cussegliera guvernativa

Stimads signurs cussegliers guvernativs

Stimadas dunnas e stimads signurs

Gentili signore, egregi signori

Sehr geehrte Damen und Herren

«La vita e la lavur en la metropola natirala. Viver la meglra vita en il Grischun.»

Quai è duas devisas da la visiun e filosofia da la marca Graubünden, che po bainchapi festivar quest onn ses giubileum da 20 onns. Oz vuless jau drizzar in appel a Vus e mussar, tge rolla impurtanta che Vus sco deputadas e deputads adempris per pussibilitar e per garantir la vita e la lavur en il Grischun sco er per far fit quellas per las sfidas socialas ed ecologicas.

Per quai dovri trais chaussas, numnadamain economia, ecologia e fatgs socials sco simbiosa per in Grischun prosperant.

Il Grischun porscha dapli che mo cuntradas mirvegliusas, tradiziuns vivas ed ospitalità reala. Il Grischun represchenta er ina diversità economica. Nossa regiun è in center per il turissem, l'agricultura, l'industria ed ils servetschs. Il Grischun ha dumagnà relativamain bain ils ultims onns ch'èn stads marcads da pandemias, crisas d'energia, fluctuaziuns monetaras ed auras extremas. Tuttina vegnan la bransch e ses furniturs da prestaziuns anc adina a restar dumandads ils onns vegnants. Flexibilità, resilienza ed abilitad da s'adattar vegnan anc adina a vegnir pretendidas da las destinaziuns, dals hotels, dals restaurants, da l'agricultura, dentant er da las interpresas pitschnas e mesaunas e da l'industria en il Grischun.

Nus, il Cussegl grond, avain la clera responsabladad da promover e da garantir il svilup economic cun stgaffir bunas cundiziuns generalas, uschia ch'el è persistent e gist. Sco represchentantas e represchentants da noss chantun elegids adempris Vus ina rolla decisiva per concepir e per promover nossa economia regionala. E jau di conscientamain, economia regionala. Senza dubi è situà il motor economic industrial en la Val dal Rain Grischuna. Ma en tut noss far e demandar na dastgain nus betg ignorar las regions ed ils territoris periferics. Nus pudain esser loschs da noss manaschis agriculs innovativs che produceschan victualias d'auta qualità e che prestan ina contribuziun impurtanta per mantegnair noss meglia chapital, la cuntrada cultivada. Lain contribuir cun nossas decisiuns al fatg, ch'er las abitantas ed ils

abitants da questas regiuns hajan in'existenza ed in gudogn, e – gist en vista a la discussiun actuala davart la promoziun da la construcziun d'abitaziuns – ch'er tuts hajan in suttetg en l'avegnir.

Per che nus possian far quai, stuain nus enconuscher e prender serius ils basegns ed ils interess da nossas interpresas, da nossas lavurantas e noss lavurants, da nosssa populaziun. Nus stuain far ina politica che permetta da crear in ambient da fatschenta favuraivel. Nus stuain encuraschar las interpresas, e betg las decuraschar tras birocrazia e scumonds, d'investir e da crescer en il Grischun. La birocrazia exorbitanta envers las interpresas pitschnas e mesaunas ed envers las interpresas grondas stuessan nus, ils furniturs da las decisiuns politicas, franar. Nus stuain esser prospectivs e prender novas vias ensemen cun interprendiders innovativs dals secturs dal turissem, da l'energia, dal traffic e da l'agricultura. Uschia sco che gia noss perdavants han per exempel fatg cun la construcziun da la Viafier retica.

Laschai m'exprimer quai cun ils plets d'in gastronom: «Nus, il Cussegl grond, essan responsabels per la MISE EN PLACE, per metter a disposiziun las cundiziuns generalas». Mise en place signifitga er l'organisaziun e la preparaziun avant che cuschinar per propi. Quai gida a producir – cun recepts da cuschinar - tratgas d'auta qualitat. E per realisar questa auta qualitat en la politica èn la finala responsablas nosssa Regenza e l'administraziun. Vus vesais: per ch'in bun menu reusseschia, dovri tant ina preparaziun bain planisada sco er la cumpetenza ed il sentiment durant la preparaziun. La lavur da team è essenziala en la politica sco er cun cuschinar ed en cuschina. Per il proxim onn presidial giavisch jau in Cussegl grond ch'è conscient da sia rolla da team e che chatta cuminaivlamain e cun responsabladad soluziuns constructivas per nus tuts. Nus stuain metter ils binaris politics che servan al bainstar da nossas burgaisas e noss burgais. Nus stuain prender decisiuns finanzialas cun ils daners ch'èn vegnids gudagnads da nossas interpresas sco er da nossas abitantas e noss abitants.

Nus avain la gronda responsabladad che la vita e la lavur en il Grischun hajan in bun avegnir.

Jau ma legrel da prender per mauns questas sfidas ensemen cun Vus, ed avrel qua tras la sessiun d'october 2023.